

कुण जाण या माया श्याम तेरी अजब निराली रै,
यो त्रिलोकी को नाथ जाट को बणगयो हाली रै ॥ टेर ॥

1. सौ बीघा मं खेत जाट को, राम भरोसे खेती रै,
आधा मं बोया गेहुं चणा, आधा मं दाणा मेथी रै,
बिना बाड़ को खेत जाट क राम रुखाली रै ॥ यो त्रिलोकी को ॥

2. भूरि भैंस चिमकणी जाट क, दो भेली दो न्यारी रै,
बिना बाड़ को बाड़ो जाट क, बांध न्यारा न्यारा रै,
चोर आवै और चक्कर लगावै जावै खाली रै ॥ यो त्रिलोकी को ॥

3. जाट जाटणी सुख सुं सोवै, सोवै टाबर टोली रै,
श्याम धणी क पहरा मं या, कैर्यो होवै चोरी रै,
चोर आवै और ऊबो दीख, जावै खाली रै ॥ यो त्रिलोकी को ॥

4. बाजरै की रोटी खावै, ऊपर घी को लचको रै,
पालक की तरकारी सागै, भर मूली को बटको रै,
छाछ राबड़ी का करै कलेवा, भर भर थाली रै ॥ यो त्रिलोकी को ॥

5. नामदेव को छपरो छायो, लक्ष्मी बन्ध खिचायो रै,
चेजारो बण चिणबा लाग्यो, हाथां गारो ल्यायो रै,
चोबारो चिण तालो जड़ दियो, ले गयो ताली रै ॥ यो त्रिलोकी को ॥

6. सोहनलाल लुहार श्याम यो घर भगतां क आवै रै,
धाबलिया क पड़दा की ओट म, श्याम खीचड़ो खावै रै,
भगतां क संग नाचै गावै, दे दे ताली रै ॥ यो त्रिलोकी को ॥